

**Kit Siang kecewa Abdul Ghani tidak dilantik dalam Kabinet
Malaysian Insider
May 16, 2013**

KUALA LUMPUR, 16 Mei — Penasihat DAP Lim Kit Siang kecewa kerana Datuk Seri Najib Razak tidak melantik bekas menteri besar Johor Datuk Abdul Ghani Othman ke dalam Kabinet yang diumumkan semalam.

Dalam Pilihan Raya 2013 lalu, Lim mengalahkan Abdul Ghani di kerusi Parlimen Gelang Patah dengan majoriti 14,762 undi.

"Saya amat kecewa dengan pengkhianatan Umno terhadap Ghani Othman yang benar-benar diabaikan dan bukannya dilantik sebagai Senator dan Menteri di dalam barisan baru Kabinet yang diumumkan oleh Perdana Menteri, Datuk Seri Najib Razak semalam," tulis Lim dalam kenyataannya hari ini.

"Kempimpinan Umno telah memberikan pujian menggunung tinggi kepada Ghani ketika kempen Pilihan Raya Umum ke-13 apabila meletakkan beliau sebagai calon parlimen untuk Gelang Patah menentang saya, dan pemimpin Umno berlaku tidak adil dan tidak mengenang budi dengan mengetepikan Ghani selepas kegagalannya menewaskan saya di Gelang Patah dalam pilihan raya 5 Mei," tambah beliau lagi.

Menurut Lim, pilihan raya umum tidak dianggap sebagai pertandingan kalah mati, dan dalam kes Abdul Ghani beliau secara terbuka mengakui telah memberikan sumbangan tidak ternilai kepada pembangunan dan kemajuan Johor.

Ahli Parlimen Gelang Patah juga mengatakan kemampuan Abdul Ghani sepatutnya diserap oleh kerajaan Persekutuan kerana bekas menteri besar Johor itu masih boleh memberikan khidmat dan sumbangan untuk tempoh lebih panjang.

"Satu kritikan terhadap Kabinet yang diumumkan Najib semalam ialah kurangnya "bintang" atau kualiti "wow".

"Satu-satunya yang berdiri lebih tinggi dari segi kemampuan intelek berbanding yang lain di dalam barisan Kabinet ialah graduan Oxford, Ketua Pemuda Umno, Khairy Jamaluddin, akan tetapi pernah menyakiti terlalu ramai sepanjang zaman kegemilangannya sebagai menantu kepada Tun Abdullah dalam tempoh pendek bapa mertuanya sebagai perdana menteri Malaysia," tambah Lim merujuk kepada bapa mertua Khairy, Tun Abdullah Badawi.

Selepas Pilihan Raya 2013, Lim bersungguh-sungguh berkempen untuk memastikan Najib melantik Abdul Ghani sebagai anggota Kabinet bagi membantu kerajaan di peringkat pusat.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/kit-siang-kecewa-abdul-ghani-tidak-dilantik-dalam-kabinet/>

